


*Historianan for di
Tèstamènt Bieu*


1 E promé hendenan

Génesis 1-3

Na kuminsamentu no tabatin nada. Ni aire. Ni awa. Ni mundu.
Solamente Dios tabat'ei. I Dios a krea mundu.




Mundu tabata skur. Dios ta bisa: 'Mester bin klaridat!' i diripiente tabatin lus.
E lus ta briante i transparente. 'Esei ta bunita', Dios ta bisa den su mes.
Dios ta yama e lus 'dia' i e skuridat E ta yama 'nochi'.



E di dos dia Dios ta traha un dak blou grandi pa mundu.
E ta yama e dak: shelu.
E di tres dia Dios ta traha laman i tera.
Olanan grandi ta dal kontra e barankanan.
Dios ta bisa ku palu i mata di mondi mester krese.
Mundu ta bira bèrdè. Meimei di e yerba ta krese flor.



E di kuater dia Dios ta traha lampi pa den shelu: Solo, luna
i strea. E di sinku dia Dios ta traha piská i para.
Ta un bista alegre. Dios ta mira ku tur kos ta bunita i bon.




E di seis dia Dios ta traha e bestianan riba tera: leon, kokolishi,
olefante i araña.
'Awor Mi ke traha hende ku parse Mi', Dios ta bisa.
I E ta traha hende, hòMBER i muhé.
Dios ta wak e mundu, e palu i e matanan, e hende i e animalnan.
I E ta mira ku nan ta hopi bon.
Dios ta sosegá e di shete dia.



Adam i Eva ta gusta ta den e hòfi ku Dios a traha.
Tin hopi palu i nan tur ta kargá ku fruta.
Nan mag kome kuantu ku nan ke for di nan.
Tin ún palu ku nan no mag kome for di dje.
Esei ta e palu ku ta siña bo loke ta bon i loke ta malu.

Un dia Eva ta serka banda di e palu prohibí. Ei e ta mira un kolebra.
'Eva', e kolebra ta bisa, 'kasi sigur Dios no ke pa boso mishi ku nada den e hòfi!'
'Kómpolaga', Eva ta bisa. 'Nos mag kome for di tur palu, ku eksepsjon di esun akí.
Si nos kome for di e palu akí, nos lo muri.'
E kolebra ta kuminsá hari. 'Bo no ta kere esei tòg?', e ta bisa.
'Dios a gaña. Si bo kome for di e palu akí, bo ta bira meskos ku Dios, antó lo bo sa
tur kos. I esei naturalmente E no ke.'
Eva ta wak e palu. Lo ta bèrdat? E frutanan ta mustra ku nan tin hopi awa i ku
nan ta dushi.
'Kome numa!', e kolebra ta bisa.
Eva ta kue un fruta i e ta dal un hap.
'At'akí', e ta bisa Adam, 'purba numa.' Adam tambe ta dal un hap.
Mesora Adam i Eva sa ku nan a hasi algu masha malu mes.



E anochi ei Dios ta keiru den hòfi.
Adam i Eva ta skonde tras di e matanan.
'Adam!', Dios ta bisa na bos haltu. 'Unda bo ta? Di kon bo ta skonde?'
'Mi tabatin miedu di Bo', Adam ta bisa na bos abou.
Dios ta puntra: 'Di kon bo a kome for di e palu?'
'Eva a duna mi e fruta', Adam ta bisa.
'Nò, ta kulpa di e kolebra', Eva ta bisa.
'Mi ta tende kaba', Dios ta bisa. 'Boso ta kulpa otro.
Pakiko boso no a obedesé Mi?
Mihó boso bai biba un otro kaminda.
Mi no ke pa boso hasi mas kos malu den e hòfi akí.'
Asina ei Dios ta saka e hendenan for di e hòfi bunita.

